



PASINAYANG TALUMPATI

NG HALAL NA
PANGULO
NG

REPUBLIKA NG PILIPINAS

JOSEPH EJERCITO ESTRADA

HUNYO 30, 1998 • QUIRINO GRANDSTAND
LUNETAS LUNCSOD NG MAYNILA

ITO ANG PILIPINO

Ang Pilipino ay may marubdob na pagmamahal at pagmamalaki sa sariling wika.

Kaya sa kauna-unahang pagkakataon sa kasaysayan ng ating bansa ay ngayon lamang bibigkasin ng isang halal na Pangulo ng Republika ng Pilipinas ang kanyang Pasinayang Talumpati sa Wikang Filipino.

Ito ay nakakapag-alinlangan, nguni't isang makabayang hakbang tungo sa pagkakaisa at upang lalong maitanghal ang Pilipinas sa buong mundo bilang isang ganap na malayang bansa!

Nagmula sa lahi ng magigiting at dakilang mga bayani, ang Pilipino kailanman ay hindi pasasakop at pasusupil sa mga dayuhan. Ito ay pinatunayan ng pakikidigma at paghihimagsik nina Lapu-Lapu, Raha Soliman, Andres Bonifacio, Jose P. Rizal, Apolinario Mabini, Heneral Gregorio del Pilar, Heneral Miguel Malvar, Heneral Emilio Aguinaldo, at marami pang iba.

Nasa puso ng Pilipino ang kapakanan ng kapwa bunsod ng damdaming walang magmamahal at tutulong sa Pilipino kundi kapwa Pilipino.

Na, ang bawa't mithiin niya ay nakatuon sa ikauunlad at ikabubuti ng mga susunod na salin-lahi.★



JOSEPH EJERCITO ESTRADA
HALAL NA PANGULO
REPUBLIKA NG PILIPINAS



FVR^{AT} JEE

Makikita sa mga maaliwalas na mukha nina Pangulong Fidel Valdez Ramos at halal na Pangulong Joseph Ejercito Estrada ang matibay na paniniwala sa maayos at tahimik na pagsasalin ng tungkulin at kapangyarihan ng Panguluhan.

Sa kabila ng mga negatibong ulat kaugnay sa napakahalagang transisyon ng gobyerno, pinatunayan ng dalawang pangulo na ang demokrasya sa bansa ay umiiral at buhay na buhay.

Dahil dito, ang Pilipinas at ang sambayanang Pilipino ay minsan pang tiningala ng lahat ng mga mamamayan sa buong daigdig bilang isang tunay na huwaran ng malinis at matatag na demokrasya.★



Tanggapan ng Pangulo ng Pilipinas
Malacañang
Lungsod ng Maynila



KALATAS MULA KAY PANGULONG FIDEL VALDEZ RAMOS

Ang seremonya ng demokratikong paglipat ng liderato ng ating bansa ay nangangahulugan para sa ating Republika ng pagpapatuloy ng ating nasimulan na, gayundin ng isang bagong panimula.

Nitong buwan ding ito, ipinagdiwang natin ang sandaang taong kaarawan ng Kasarinlan ng Pilipinas na nagbigay ng panibagong sigla at dangal sa mga Pilipino ngayon tungkol sa ating makasaysayang nakaraan.

Ang dalawang kaganapang ito ay magka-ugnay sapagka't pareho nila tayong pinagbabalik-tanaw sa nakalipas habang itinutuon natin ang ating paningin sa kinabukasan.

Ang nagdaang anim na taon ng Pangasiwaang Ramos ay masasabi kong nakapagdulot ng bagong pag-asa sa ating lahi dahil matagumpay tayong naglunsad ng mga repormang pangkabuhayan at panlipunan. Naibalik natin ang dignidad

ng ating pagkatao at ang paggalang sa ating bansa ng buong daigdig. Ito ay ipinamalas ng 1997 UNESCO Peace Prize na ating tinanggap kamakailan lamang.

Mas naging kahanga-hanga ang ating tagumpay sapagka't nakamit natin ito sa ilalim ng demokrasya. Minsan pang napatunayan ang pagpapahalaga natin sa ating kalayaan nang magdaos tayo ng mapayapa at maayos na eleksiyon kung saan nahalal ang ating bagong Pangulo.

Sa pagluklok ngayong araw ng aking kapalit bilang Pangulo, at sa pagpasok natin sa pangalawang dantaon ng ating pagkabansa, ako ay nananawagan sa bawa't Pilipino na tulungan ang Pangasiwaang Estrada at makilahok sa pagsulong ng ating bansa upang makamit natin ang ganap na kalayaan hindi lamang para sa kasalukuyan kundi pati na rin sa ating kinabukasan.

Maligayang bati kay Pangulong Joseph Ejercito Estrada at Mabuhay ang Pilipino!



Itinaas ang mga kamay nina Joseph Ejercito Estrada at Gloria Macapagal-Arroyo nina Pangulo ng Senado Neptali Gonzales at Ispiker ng Mababang Kapulungan Jose de Venecia bilang mga tunay at legal na halal na pangulo at pangalawang pangulo ng Republika ng Pilipinas, ayon sa pagkakasunod. Kasama rin nila sa larawan sina Senador Franklin Drilon, Ginang Loi Ejercito Estrada, Ginang Evangelina Macapagal, Kinatawan Rodolfo Albano at Atty. Jose Miguel Arroyo.

PROKLAMASYON

NG HALAL NA PANGULONG JOSEPH ESTRADA, TAGUMPAY NG MASANG PILIPINO

"Gagawin ko ang lahat ng aking makakaya at ang aking tanging misyon bilang Pangulo, una at pinakamahalaga, ay ang paglapitin ang agwat sa pagitan ng mayaman at mahirap. Iyan ang aking tanging misyon. Nawa'y magtagumpay ako."

Laging nasa puso at diwa ang kapakanan ng mahihirap, ito ang ipinangako ni Joseph Ejercito Estrada noong hapon ng Biyernes, Mayo 29, 1998, nang siya ay iproklama sa magkasanib na pulong ng Senado at Mababang Kapulungan ng Kongreso bilang halal na Pangulo ng Republika ng Pilipinas.

Kasabay niyang iprinoklama bilang Pangalawang Pangulo ng Republika si Gloria Macapagal-Arroyo.

Sa mataginting na mga tinig na umalingawngaw sa malawak na bulwagan, matapos na magkasunod na ipukpok ang kanilang mga malyete, iprinoklama nina Pangulo ng Senado Neptali Gonzales at Ispiker ng Mababang Kapulungan Jose de Venecia ang dating aktor sa pelikulang Pilipino sa harap ng humigit-kumulang na 4,000 taong nagsiksikan sa bulwagan ng Batasang Pambansa.

Ang idolo ng sambayanang Pilipino ay tumanggap ng 10,722,295 boto sa halalang pampanguluhan noong Mayo 11, 1998. Ito ay kumakatawan sa 39.95 porsiyento ng kabuuang 26,902,536 na boto mula sa iba't ibang panig ng bansa.

"Ngayon ay magkahalo ang aking damdamin. Napakaligaya ko dahil sa pagtitiwalang ibinigay sa akin ng mga mamamayan, lalo na ng masang Pilipino at kasabay nito alam kong nahaharap ako sa isang napakabigat na tungkulin sa paglutas ng mga problema ng bansa."

Bilang makabagong Andres Bonifacio na hinamak ng mga ilustrado, walang alinlangang pangunahin pa sa kanyang puso ang ikabubuti at ikauunlad ng masang Pilipino - lalo na ng kabataan - na naghahangad ng disenteng pamumuhay, sapat na pagkain at tapat na gobyerno.

Ang proklamasyon, samakatuwid, ng halal na Pangulong Joseph Ejercito Estrada ay malinaw na simbolo ng tagumpay ng masang Pilipino!★

MGA ESTRADA, 'IPINASYAL' NG MGA RAMOS SA MALAKANYANG



Masayang nagbatian sina Pangulong Fidel Valdez Ramos at halal na Pangulong Joseph Ejercito Estrada sa Malakanyang gayundin sina Unang Ginang Amelita "Ming" Ramos at papalit na Unang Ginang Loi Ejercito Estrada.

Noong Hunyo 4, 1998, ipinasyal nina Pangulong Ramos at Unang Ginang Amelita "Ming" Ramos ang halal na Pangulong Joseph Ejercito Estrada at magiging Unang Ginang, Dr. Loi Ejercito Estrada, at mga anak na sina Mayor Jinggoy Estrada ng San Juan; Jackie at Jude sa buong Palasyo ng Malakanyang.



Masayang kumakaway si halal na Pangulong Joseph Ejercito Estrada sa mga miyembro ng Presidential Security Group sa likuran ng PSG gym habang may itinuturo sa kanya si Pangulong Fidel Valdez Ramos.





Sa pangunahing labasan ng Malakanyang ay sinalubong sina Pangulong Fidel Valdez Ramos at halal na Pangulong Joseph Ejercito Estrada ng mga opisyal at mamamahayag.

Masayang nagsimula ang pamamasyal ng dalawang Unang Pamilya ng bansa sa ganap na ika-12:30 ng hapon na tumagal nang halos limang oras kabilang na ang pananghalian sa Premier Guest House. Ito ay bahagi ng unang serye ng pagsasaayos ng lahat.

Ang mga Estrada ay humanga sa paraan ng mga Ramos sa pagpapanatili at pagbabago sa Palasyo, lalo na ang Malacañang Park o ang Presidential Security Group compound sa kabila ng Ilog Pasig.

Ipinakita nina Pangulo at Unang Ginang Ramos sa pamilyang Estrada ang iba't ibang mga silid sa Palasyo tulad ng Music Room, Rizal Room, ang Heritage Museum at ang kapilya. Nasa likuran ng Rizal Room ang study room ni Pangulong Ramos na kinaroroonan ng mga computer at mga kagamitan na satellite.

Naroon din ang koleksiyon ng mga aklat ni Pangulong Ramos na maayos na nakalagay sa isang malaking salaming lalagyan na labis na hinangaan ng magiging pangulo.

Ipinakita din ng mga Ramos sa mga Estrada ang punong balete, isang siglo na ang edad na pinangalanang "Mr. Brown".

Pagkatapos ng tanghalian ay tumawid sila sa Ilog Pasig at sinuri ang golf club, ang Bahay Pangarap, ang swimming pool, ang gym at ang Mabini Shrine.

Inialok ni Ginang Ramos kay Ginang Estrada ang Bahay Pangarap na madalas pagdausan ng mga pulong

at pag-alihw sa mga panauhin, bilang pansamantala niyang tanggapan simula sa Hunyo 11.

Sa gym, ang dating manlalaro ng basketball na si Erap ay dalawang ulit na sumubok sa three-point lane. Gayundin si Pangulong Ramos.

Sa Mabini Shrine, si Pangulong Estrada ay binati ng mga opisyal ng Presidential Security Group na naglibot sa kanya sa Officers Club.

Sa loob ng club ay ipinakita kay Pangulong Estrada ang isang mini disco. Nguni't sinabi niyang mas gusto niya ang malawak na hardin para makatakbo at ang gym para makapag-ehersisyo.

Ang mga Estrada at ang dalawa nilang anak ay maninirahan sa Premier Guest House.

Ayon kay Ginang Estrada, ang bahay sa Arlegui na ginawang tahanan din ni dating Pangulong Corazon C. Aquino ay lubhang napakalaki para sa kanilang pamilya.

"Masyadong malaki para sa mga bata," sabi ni Ginang Estrada.

Sinabi ni Ginang Estrada na hindi siya gagawa ng anumang malaking mga pagbabago sa Palasyo maliban sa ilang maliliit na bagay sa Guest House.

Bagama't kapwa pagod at nananakit na ang mga paa, masayang tinapos ng dalawang Unang Pamilya ang paglilibot at pamamasyal sa Palasyo ng Malakanyang na buo ang paniniwala na ito ang magiging maayos at matahimik na simula. ☼

PANG-HABANG PANAHON

GOBYERNO NG PAMBANSANG PAGKAKAISA



Itaas: Magkakasama sa larawang kuha bago mag-eleksiyon sina Pangalawang Pangulong Josephe Ejercito Estrada, Pangulo ng Senado Neptali Gonzales, Pangulong Fidel Valdez Ramos, Tagapangulo ng Komisyon sa mga Halalan Bernardo Pardo at Ispiker ng Mababang Kapulungan Jose de Venecia ukol sa isang malinis, maayos at tahimik na halalan. Ibaba, kaliwa: Itinaas ni dating Alkalde ng Maynila Alfredo S. Lim ang kamay ni Pangalawang Pangulo Joseph Ejercito Estrada sa pagkakahalal ni Estrada bilang pangulo ng bansa. Ibaba, Kanan: Masayang tinanggap ni halal na Pangulo Joseph Ejercito Estrada ang malugod na pagbati ni Kapatid Mike Velarde ng El Shadai tungo sa pambansang pagkakaisa hindi lamang sa larangan ng pulitika kundi maging sa pananampalataya man.

Nasa pambansang pagkakaisa ang tunay na lakas ng Pilipino.

Ito ang pangunahin sa puso ni halal na Pangulong Joseph Ejercito Estrada. Kaya tinitiyak niya na bibigyan ng tunay na kahulugan ng kanyang pangasiwaan ang pagkakaisa hindi lamang sa pulitika kundi sa lahat na antas ng lipunan sa buong bansa.

Bilang unang hakbang tungo sa pambansang pagkakaisa, hinirang niya si halal na Pangalawang Pangulong Gloria Macapagal-Arroyo bilang Kalihim ng Kagawaran ng Kagalingan at Kaunlarang Panlipunan.

Ang hakbang na ito ni Pangulong Estrada ay nagpakita hindi lamang ng kanyang pagkamaginoo sa tagumpay kundi ng tapat at taimtim na hangaring mapaghilom ang sugat na likha ng nagdaang labanan sa pulitika.

Hinirang din niya si dating Kalihim Tagapag-

paganap Alexander Aguirre bilang Tagapayo sa Pambansang Seguridad. At marami pa siyang itinalaga sa tungkulin na ikinamangha ng sambayanan dahil sa hindi niya kasama sa lapian ang mga ito.

Gayunman, sa mga nagtaka, ganito ang kanyang paliwanag:

“Kailangang magkaisa tayong lahat para sa kapakanan ng bayan.”

Malambot ang puso ni Erap sa mga taong nalugmok – kalaban man sa pulitika o hindi.

Matibay ang paniniwala at paninindigan ng halal na Pangulong Joseph Ejercito Estrada na ang pambansang pagkakaisa na paiiralin ng kanyang gobyerno ay hindi lamang sa pulitika at ekonomiya magaganap.

Higit sa lahat, marubdob na mithiin niya na pag-isahin ang buong sambayanang Pilipino sa isip, sa salita at sa gawa.★



Nakangiting tinitingala ni halal na Pangalawang Pangulo Gloria Macapagal-Arroyo, kasama sina halal na Pangulong Joseph Ejercito Estrada at Ginang Loi Ejercito Estrada, ang nagwawagayway na bandila ng Pilipinas na kanilang itinaas sa tagdan sa harap ng bantayog ni Dr. Jose Rizal sa pagdiriwang ng Sentenaryo ng Kalayaan ng bansa noong Hunyo 12, 1998.

LAGING BUHAY ANG DIWA NG SENTENARYO SA BAWA'T PILIPINO

Ang Sentenaryo ng kalayaan ng ating bansa ay amanatiling buhay at naglalagablab sa katauhan ng bawat Pilipino.

At para sa halal na Pangalawang Pangulong Gloria Macapagal Arroyo lubhang napakahalaga nito dahil ang kanyang yumaong ama — si dating Pangulong Diosdado P. Macapagal — ang nagpahayag ng Hunyo 12 bilang nararapat na araw upang gunitain ang Kalayaan ng Pilipinas.

“Ang Hunyo 12 ay hindi lamang sentenyal na anibersaryo ng ating kalayaan bilang isang bansa. Ito ay isang katibayan ng ating kakayahang maging malaya, at isang pagpapakita ng ating determinasyon upang manatiling malaya, sa krisis o kaguluhang maaring yumanig sa ating bansa. Ito ay isang patotoo, isang paalaala sa lahat na ang ating mga bayani ay nagbuwis ng buhay para sa kalayaang tinatamasa natin ngayon,” wika ni Ginang Macapagal-Arroyo.

“Habang ipinagdiriwang natin ang makasaysayang 100 taon ng ating kalayaan at sa pagsalubong sa pagpapalit ng bagong administrasyon, kumuha tayo ng inspirasyon mula sa katalinuhan at katapangan ng mga kabataang rebolusyunaryo ng 1898, sa matatag na sundalo at gerilya ng ikalawang Digmaang Pandaigdig at iba pang mga bayani para sa walang humpay na pagkakamit ng ating pananaw ng pag-unlad at pagsulong,” dugtong pa niya.

Ang bagong halal na Pangalawang Pangulong Gloria Macapagal Arroyo ay isa sa mga babae sa kasalukuyan na umuukit ng pangalan sa larangan ng

paglilingkod sa bayan.

Mula sa maikling panahong panunungkulan bilang pangalawang kalihim ng pananalapi, siya ay hinimol na tumakbo bilang senador sa halalan noong 1992. Pangsiyam siya sa nabanggit na halalan.

Muli siyang kumandidato bilang senador noong 1995. Malinaw niyang pinangunahan ang halalang iyon sa pagkakamit ng mahigit sa 16 na milyong boto ang pinakamataas na naitala sa kasaysayang pulitika ng ating bansa.

Bilang senadora, siya ay kinilala at iginalang bilang ekonomista ng senado. Nakapagharap siya ng 47 panukalang batas at resolusyon tungkol sa ekonomiya partikular na sa paglahok ng Pilipinas sa Pandaigdig na ekonomiya. Sa mga ito ay 48 ang ganap na nagin batas.

Itinuturing na dangal ng Senado, nahalal siyang Pangalawang Pangulo noong Mayo 11, 1998 kasabay ng pagkakahalal kay Joseph Ejercito Estrada bilang Pangulo ng Republika ng Pilipinas.

Sa paglilingkod na pambayan ay inilarawan ni Ginang Gloria Macapagal-Arroyo sa pagkilos, salitang at gawa ang mga kasukdulan ng isang tunay na Pilipina. Marunong siyang magsalita ng Filipino, Ilokano, Kapampangan, Cebuano, at hiligaynon.

Nagmula sa tradisyon ng taal ng Pilipino, si Ginang Gloria Macapagal-Arroyo ay kasal kay Abogado Jose Miguel T. Arroyo ng Negros at ina ng tatlong matatalinong anak na sina Mikey, Diosdado at Luli.

LUNETA PARK
HUNYO 12, 1998

MAKULAY, MASIGLA AT MATAGUMPAY NA PAGDIRIWANG NG IKA-100 TAON NG ATING KALAYAAN

Ang paggunita sa Ika-isandaang taon ng ating Kalayaan noong Hunyo 12, 1998 ang pinakamakulay, pinakamasigla at pinakamatagumpay sa lahat ng pagdiriwang na ginanap sa ating bansa.

Ganap na ika-6:00 pa lamang ng umaga ay humugos na ang mga tao sa lahat ng mga makasaysayang lugar na pagdarausan ng pagdiriwang ng Sentenyal ng Kalayaan.

Sa harap ng bahay ni Heneral Emilio Aguinaldo sa Kawit, Cavite ay naroon ang may 15,000 tao na sumaksi sa muling pagbasa ni Pangulong Fidel Valdez Ramos ng pagpapahayag ng kalayaan at pagwawagayway ng bandila ng Unang Republika ng Pilipinas.

Itinaas nina halal na Pangulong Joseph Ejercito Estrada at halal na Pangalawang Pangulong Gloria Macapagal-Arroyo ang malaking bandila ng Pilipinas sa mataas na tagdan sa harapan ng bantayog ni pambansang bayaning Dr. Jose P. Rizal sa Luneta.

Sa harap ng libu-libong tao ay sinabi ni halal na Pangulong Estrada: "Hindi ko hahayaang mamatay ang kalayaang ipinaglaban ng ating mga ninuno."



Sumasaludo sina halal na Pangulong Joseph Ejercito Estrada at halal na Pangalawang Pangulong Gloria Macapagal-Arroyo matapos nilang itaas ang bandila ng Pilipinas sa tagdan nito sa harap ng bantayog ng pambansang bayani si Dr. Jose P. Rizal sa Luneta sa pagdiriwang ng ika-100 taon ng ating kalayaan noong Hunyo 12, 1998.



Samantalang binibigkas ni halal na Pangulong Joseph Ejercito Estrada ang kanyang talumpati kaugnay sa pagdiriwang ng sentenaryo ng ating kalayaan. Tinawagan niya ang lahat ng Pilipino na magkaisa para sa patuloy na pag-unlad ng ating bansa.



Itinataas ni halal na Pangulong Joseph Ejercito Estrada ang bandila ng Pilipinas katulong sina halal na Pangalawang Pangulong Gloria Macapagal-Arroyo at Ginang Loi Ejercito Estrada sa pagdiriwang ng ika-100 taon ng ating Kalayaan noong Hunyo 12, 1998.



Sumasaludo sina halal na Pangulong Estrada, Pangalawang Pangulong Macapagal-Arroyo, Ginang Ejercito Estrada, Rear Admiral Onofre Q. Marcelo ng Hukbong Dagat ng Pilipinas, Gobernador ng Metro Manila Development Authority Prospero Oreta, Alkalde ng Maynila Lito Atienza, Alkalde ng Lungod Quezon Ismael Mathay, Jr. at Alkalde ng Lungsod ng Makati Jejomar Binay.

Pinangunahan ni Ispiker Jose de Venecia ng Mababang Kapulungan, sa tulong ni Alkalde Reynaldo Malonzo, ang pagtataas ng bandila sa bantayog ni Andres Bonifacio sa Lungsod ng Kalookan.

Si Punong Mahistrado ng Kataastaasang Hukuman Andres Narvasa naman ang namuno sa pagtataas ng bandila sa Simbahan ng Barasoain sa Malolos, Bulacan. Si Pangulo ng Senado Neptali Gonzales ang sa monumento ng makasaysayang Pinaglabanan, San Juan.

Hindi inalintana ng may limang milyong tao ang nakapapasong sikat ng araw mapanood lamang ang makulay na paradang nilahukan ng 41 karosa na nagbigay-buhay sa kasaysayan ng pagsilang ng ating bansa.

Kabilang sa mga karosang pinalakpakan ng mga tao ay ang karosa ng La Solidaridad na nagpasimula

sa Kilusang Propaganda.

Labis din nilang hinangaan ang magandang karosa ng Rebolusyon ng EDSA noong 1986. Ang mga dilaw na bandila at ginintuang replika ng Bantayog ng EDSA na nakasakay sa karosa ay mapanghalinang sumalungat sa nag-aagaw-dilim na kulay ng langit.

Pagkatapos ng makulay na paradang nilahukan ng mga artista sa pelikula, ang milyung-milyong tao ay naghintay pang gumabi upang panoorin ang pinakamalaki, pinakamaliwanag at pinakamakulay na 30 minutong pagpapasabog ng mga luis sa kalangitan ng Look ng Maynila.

Pagkatapos ng makulay, masigla at matagumpay na palabas ang bawat Pilipino ay taas-noong makapagsasabing: "Ikinararantal ko na ako ay Pilipino." ☺



Masayang nakisalimuha si halal na Pangulong Joseph Ejercito Estrada sa mga taong bumati sa kanya.



Nakikinig sina halal na Pangulong Joseph Ejercito Estrada at Ginang Loi Ejercito Estrada sa katutubong awitin na inaawit ng isang grupo ng mga kabataan kaugnay sa naturang pagdiriwang.




Isa sa mga karosa, nagpapakita ng pagsilang ng Kristiyanismo sa ating bansa.



Hawak ng bata ang bandila ng Pilipinas habang nasa kanyang likuran ay sakay na kabayo ang isang "Katipunero". Itaas: Ang pinakamakulay na mga luis sa kalawakan.

JOSEPH EJERCITO ESTRADA -



JOSEPH ESTRADA, Famas Best Actor sa *Ito Ang Pilipino*; Amalia Fuentes, Best Actress sa *Ibulong Mo Sa Hangin*. Kaliwa: disenyo ng *Ito Ang Pilipino*, tumanggap ng Best Picture Award.

1961

ANG AKTOR

Masasabing wala pang makakapantay ang naging pagkilala kay Joseph Estrada sa industriya ng pelikulang Pilipino - sa pagganap at bilang prodyuser.

Si Erap ang kauna-unahang aktor na pinarangalan sa Famas Hall of Fame - sa pagtanggap ng limang Famas Award for Best Actor, 1981. Tumanggap din ang aktor ng mga parangal bilang prodyuser para sa mga pinakamahusay na pelikulang ginawa ng JE Productions, Inc. at EMAR Pictures (mga kumpanya ni Erap).

Itinatag ni Erap ang Mowelfund (Movie Workers Welfare Foundation, Inc.), nagbibigay ng tulong-pinansiyal sa pagpapagamot o pagpapalibing sa manggagawang miyembro ng foundation. Naging tagapagtaguyod siya sa maraming proyekto na nakatulong sa mga manggagawa at sa industriya, bagay na kinilala siyang institusyon ng industriya.

Sino ang mag-aakalang ang isang Joseph Marcelo Ejercito na kalaro sa basketball at pa-boksing sa San Juan ay magiging tanyag na aktor-prodyuser - sa kabila ng mg negatibong reaksiyon sa kanyang pag-aartista?

NASA ikatlong taon siya sa civil engineering sa Mapua Institute of Technology. 1957.

Hindi sinasadya, nakarating siya sa location shooting ng **Kandilang Bakal** (ng Champion Pictures) sa Quezon City kasama ng kaibigang si Yoto Padilla, anak ng sikat na aktor na si Carlos Padilla, Sr.

Katuwaan lamang ang pagganap niya sa papel na

hindi nasipot ng aktor na si Boy Francisco. Ang mga ka-eksena niya: sina Jose Padilla, Jr. at Lilia Dizon. "Take one!" ang unang pagharap ni Erap sa kamera.

Mula sa Champion Pictures ay kinuha si Erap ni Direktor Gregorio Fernandez (ama ni Rudy Fernandez) at ipinakilalang Joseph Ejercito sa **P 10,000 Pagibig** ng LVN Pictures - kasama sina Eddie Rodriguez at Charito Solis!

Nakita ang malaking interes ni Erap sa pag-aartista. Tutol na tutol naman ang kanyang ina, si Ginang Mary Marcelo Ejercito, na, ang gusto'y ituon na lamang ni Erap ang panahon sa pag-aaral. Makatapos.

"Mga mestiso lamang at kulot ang buhok ang sumisikat sa pelikula!" Narinig sa mga "kontrabida" ng San Juan.

Tinanggap niyang paghamon ang mga paghamak sa kanya. Kailanman ay hindi siya tumatalikod sa mga paghamon.

Likas na masipag si Erap. Sapagka't bakasyon sa eskuwela, tumanggap siya ng "summer job" sa isang ospital sa Mandaluyong - sa supplies department. Nakilala niya ang magandang psychiatrist ng ospital si Dr. Loi Pimentel! Nagkalapit ang kanilang mga loob hanggang naipagtatapat na niya sa doktora ang kanyang problema: pag-aartista o pag-aaral?

Sa Larry Santiago Productions siya ipinakilalang Joseph Estrada - sa isa sa apat na istorya ng **Mga Lihang Kay Tita Dely, Blacksheep Gang**. Nakilala niya ang naging kaibigan agad ang isa ring kontratadong aktor ng LSP - si Fernando Poe Jr. Narinig din kay Ronni

ISANG KASAYSAYAN



1969 ANG MAYOR

Sa sandali ng panunumpa sa tungkulin ni Mayor Joseph Estrada ng San Juan sa Harap ni Judge Andres Reyes. Kanan: bahagi ng seremonyang parangal ng San Juan Police Department kay Mayor Estrada. Kasabay nito, ipinahayag ng alkalde ang gagawin ng kanyang administrasyon na propesyonalisasyon ng pulisya.



Pagpasok ng 1967, taon ng eleksiyon, isang grupo ng mga taga-San Juan ang humarap kay Erap at tuwirang nagpahayag ng kanilang kagustuhang ang aktor ang napipisil nilang maging mayor ng nasabing bayan. Naniniwala silang nasa kayahan ni Erap ang pag-asang umunlad ang bayan ng San Juan.

Sapagka't nakikita ni Erap na talagang kailangan ang pagbabago sa San Juan, nagpahayag siya ng kanyang kandidatura sa pagka-alkalde ng nasabing bayan - Agosto 29, 1967, Araw ng Pinaglabanan! Haharapin niya sa eleksiyon ang nakaupong mayor na si Nicanor Ibuna at si Dr. Braulio Sto. Domingo.

Ipinaabot niya sa mamamayan ng San Juan ang tatlong unang proyekto niya kapag siya'y nahalal: mataas na paaralang pang-publiko, maipagmamalaking pamilihang bayan at propesyonalisasyon ng pulisya (noon ay nasa kontrol pa ng alkalde ang pulisya) para sa lalong epektibong pangangalaga sa katahimikan at kaayusan ng bayan.

Pinangunahan ni Fernando Poe, Jr. ang malalaking artistang tumulong sa kampanya ni Erap sa ilalim ng lapiang itinatag niya: Kilusan ng Bagong Pilipino. Si Lito Rodriguez ang kanyang bise-alkalde.

Sumigla ang San Juan. Tiniyak ang panalo ni Erap.

Subali't nagdilim ang pag-asa ng mga taga-San Juan ng ipinroklama ng Comelec si Dr. Braulio Sto. Domingo na nanalo ng 44 na boto kay Erap sa eleksiyon ng Nobyembre 14, 1967.

Isinampa ng mga abugado ni Erap sa Court of First Instance ng Rizal ang kanyang protesta sa eleksiyon.

Oktubre 29, 1968, ibinaba ng CFI ang desisyon: nanalo si Erap ng 192 boto sa isinagawang recount.

Iniakyat at naipanalo ni Dr. Sto. Domingo ang protesta sa Court of Appeals.

Dumulog si Erap sa Korte Suprema at pagkaraan ng may sampung buwan, idiniklara ng Kataas-taasang Hukuman na si Erap ang bagong alkalde ng San Juan!


Agosto 5, 1969 nang manumpa sa tungkulin si Mayor Joseph Estrada sa harap ni Hukom Andres Reyes.

TULAD ng dapat asahan, tinupad ni Mayor Joseph Estrada ang kanyang mga ipinangako sa bayan - propesyonalisasyon ng pulisya, mga paaralan at pagsesemento ng mga kalye.

Buhat nang manungkulan si Mayor Estrada, hindi siya tumanggap ng suweldo - pondong inilaan niya para sa mahihirap na mamamayan ng San Juan na nagkakasakit at namamatayan; at sa mga tauhan ng munisipyo tulad nga mga guro.

Sapat na ang mga nagawa ni Mayor Estrada upang bigyan siya ng mga mamamayan ng San Juan ng panalong landslide sa muling paghaharap nila ni Dr. Braulio Sto. Domingo sa eleksiyon ng 1971.

Nagpatuloy ang pag-unlad ng San Juan - makabagong matadero, pinalaking pamilihang bayan, mga playground para sa kabataan (bahagi ng kampanya ng alkalde laban sa bisyo at bawal na gamot); at ang San Juan ang kauna-unahang nagkaroon ng computerized validating machine sa treasury department at micro printer-reader at micro computer sa municipal assessor's office. Bunga ng magandang nagawa ni Mayor Estrada para sa bayan at mamamayan, tumanggap siya ng parangal na TOYM (Ten Outstanding Young Men) sa public administration. Kinilala siyang isa sa mga pangunahing alkalde ng bansa - "Outstanding Mayor and Foremost Nationalist", gawad ng International Information Service; at "Most Outstanding Metro Manila Mayor"



Ibaba: Kay Senador Estrada wikang Filipino sa bulwagan ng senado.



Hunyo 30, 1987. Ang panunumpa sa tungkulin ni Joseph Ejercito Estrada sa harap ni Justice Andres Narvasa bilang halal na senador ng bansa. Saksi sa napakahalagang pagkakataong ito ang butinhing ina ng senador, si Gng. Maria Marcelo Ejercito.

Maliwanag ang sinasabi ng mga lathalain: mga pangunahing senador; kontra sa pananatili ng base-militar ng Amerikano at pelikulang may diin hinggil sa isyu.

1987 ANG SENADOR

Nagpasya ang dating mayor ng San Juan - kakandidato siyang senador!

Sumabog sa halakhak at panunuya ang mga kritiko ni Erap.

"Abugado na ba si Erap?"

"E kung debatihin siya sa senado? Ano'ng English ang isasagot niya?"

Ang sagot ni Erap ng makarating sa kanya ang panunuya: **"Sasagutin ko sila ng Tagalog! Nalimutan na ba nilang tayo'y mga Pilipino?"**

Kumandidato si Erap sa ilalim ng Grand Alliance for Democracy.

Sa pangangampanya, walang dagat, walang bundok kay Erap. At kahit saang panig ng bansa siya makarating, sinasalubong siya ng libu-libong mamamayan - ng **masa**. At minsan pang napatunayan ang pagiging matapat na kaibigan ni Fernando Poe Jr. sapagka't sa maraming pagkakataon, kasama niya ang hari ng pelikulang Pilipino sa kampanya.

Idinaos ang eleksyon ng 1987.

Sa mga unang araw ng tabulasyon, si Erap ang nanguna, hanggang idiniklara siyang halal na senador ng bansa. Hunyo 30, 1987 nang manumpa siya sa harap ni Justice Andres Narvasa. Sa mahalagang pagkakataong ito, saksi ang kanyang mahal na ina, si ginang Maria Marcelo Ejercito.

Subali't nagbanta ang mga ka-partido ni Senador Estrada na aalisan siya ng suporta sa senado kapag hindi niya binoykot ang pagbubukas ng bagong senado,

dahil umano'y maanomalya ang nakaraang eleksiyon.

"Inihalal ako ng mamamayan. Hindi ko sila maaaring biguin!"

Pinatunayan ni Erap na hanggang sa senado ay maging sa mas mataas pang panununungkulan, dala niya ang katatagan ng kanyang desisyon - kapag para sa kapakanan ng mga mamamayang nagtiwala sa kanya.


SI Senador Joseph Estrada ay naging chairman ng komite ng senado sa Cultural Communities and Rural Development; vice chairman ng mga komite sa Health, Natural Resources and Ecology at Urban Planning at marami pang iba.

Sa mga panukalang batas na inisponsor niya ay nasasalamín ang katotohanang likas na maka-mahirap si Erap tulad ng irigasyon para sa may 1.5 ektaryang lupa sa buong kapuluan; libreng stenographic transcriptions para sa mahihirap na dumudulog sa korte; ang isa pa'y dalhin at bigyan ng proteksiyon sa iba't ibang panig ang mabilis na pagkabawas ng mga kalabaw ng bansa; at ang paglikha ng Commission on Ancentral Domain.

Nakiisa si Erap sa walong senador na tutol sa ekstensiyon ng base-militar ng Amerikano sa bansa.

"Ang tunay na kaligtasan ng ating bayan ay wala sa kamay ng mga dayuhan. Ito'y nasa kamay lamang ng nagsasariling sambayanan!"

At kahit kailan siya magsalita sa bulwagan ng



Ang panunumpa sa tungkulin ni Joseph Ejercito Estrada sa harap ni Chief Justice Andres Narvasa ng Korte Suprema bilang halal na Pangalawang Pangulo ng bansa; na, sinaksihan ni Dra. Loi Ejercito Estrada. Ibaba: ang pangalawang Pangulo at mga tauhan ng PACC sa isang operation sa Bikol.



1992 ANG PANGALAWANG PANGULO

Hunyo 30, 1992. Sa Rizal Park ay sinaksihan ng libu-libong tao mula sa iba't ibang bayan at siyudad ang panunumpa sa tungkulin ni Joseph Ejercito Estrada sa harap ni Chief Justice Andres Narvasa bilang halal na Pangalawang Pangulo ng bansa.

Ang panunumpa ay sinaksihan din nina Pangulong Fidel V. Ramos, Unang Ginang Amelita 'Ming' Ramos at Dra. Loi Ejercito Estrada.

Pagkaraan ng isang linggo, ang bagong bise presidente ay muling nanumpa — kay Pangulong Fidel V. Ramos sa pagtatalaga sa kanya bilang Chairman ng Presidential Anti-Crime Commission (PACC).

Sa loob ng mahigit na isang taon, ang PACC ay nakalutas ng mahigit na 300 kasong kriminal.

Tatlo ang grupo ng mga crimefighter ni Erap sa PACC — Task Force Habagat na pinamunuan ni Heneral Panfilo M. Lacson, Task Force Matatag ni Atty. Federico Opinon ng NBI at Task Force Kamagong ni Col. Roberto Calinisan.

Ilan sa malalaking kaso ang mababanggit :

Pagkakapatay kay Carmelito Calasan, No. 15 wanted sa bansa, sangkot sa pagdukot kay Jack Chou at sa serye ng mga pagnanakaw sa bangko;

Pag-aresto sa mga pinaghihinalaan sa mga pumaslang sa estudyante ng La Salle si Marc Paglinawan;

Ang pagkakaligtas sa biktima ng pagdukot na si Francisco Bernabe at ang pagkakabalik ng P2.7 milyon na pang-ransom;

Ang pagkakaligtas kay Teofilo Garcia, biktima ng kidnap at ang pagkakabalik ng P1.2 milyon at ang pagkakaaresto sa tatlong pinaghihinalaan.

Pagpuksa ng PACC sa Almira Gang, responsable

sa maraming nakawan at holdap sa Metro Manila;

At ang unang engkwentro ng PACC sa Red Scorpion Group kasunod ang pagkakapatay sa lider ng RSG na si Alfredo de Leon, Public Enemy No. 1!

DATAPWA'T hindi lamang ang pagtugis ng kriminal ang naging 'trabaho' ng bise presidente — sa maraming pagkakataon, tumupad siya ng diplomatikong misyon para sa ating pamahalaan.

Ang pagdalo niya sa makasaysayang inagurasyon ni South African President Nelson Mandela ay isang tagumpay — nakausap niya ng pribado ang African Leader sa loob ng may kalahating oras sa Presidency building sa Pretoria. Tinawag siyang "winner" ng isang pahayagan sapagka't ang resulta ng nasabing pagdalo niya sa South Africa ay lalong nagpatibay sa relasyon ng dalawang bansa.

Bukod sa pag-uusap nina Vice President Estrada at South African President Mandela, may misyon na itinalaga sa kanya si Pangulong Fidel V. Ramos sa nasabing okasyon: kausapin at pagpaliwanagan ang Indonesian Prime Minister na si Ali Alatas hinggil sa kontrobersiyal na Asia-Pacific Conference sa Maynila, sa isyu ng human rights sa East Timor, Katolikong lalawigan sa Indonesia. Nakausap ng Pangalawang Pangulo ang mataas na opisyal ng Indonesia — at tinawag naman siyang "peacemaker" ni Pangulong Ramos!

Sa imbitasyon ng pamahalaan ng Guam, dumalaw si Vice President Estrada sa nasabing bansa. Nailarawan niya sa may 40,000 miyembro ng Filipino-American Chamber of Commerce ang pagsulong ng ekonomiya sa ating bansa at ang pagiging isang matahimik na



MAYO 11,
1998

HALAL NA PANGULO NG BANS!

Tapos na ang hirap at sakripisyo niya sa pangangampanya!

Wala na ang mga pagtatangkang gibain ang pagkatao niya at putulin ang layunin niyang makapaglingkod pa ng matapat sa bayan!

Ang lahat ay 'sinuklian' ng mahigit na 10,000,000 boto ng Pilipino – inihalal siyang pangulo ng bansa, sa ika-100 taon ng ating kalayaan.

Joseph Ejercito Estrada, Sentenyal na Pangulo!

ANG AKTOR

ang pagsang-ayon na si Joseph Estrada lamang ang dapat gumana sa tittle role ng pelikulang binabalak gawin ng LSP: **Asiong Salonga**.

Ang **Asiong Salonga** na unang tittle role ni Erap ang pinakamalakas na pelikula ng nasabing taon, 1961!

Hindi eksklusibo ang kontrata ni Erap sa LSP kaya nakagawa siya ng pelikula sa iba't ibang kumpanya tulad ng Tagalog Ilang-Ilang Pictures kung saan tumanggap siya ng unang Famas Award bilang pinakamahusay ng aktor sa pelikulang **Markang Rehas**.

Mataas ang iniangat ng pangalang Joseph Estrada. Tinawag si Erap na "total action star."

Nagtayo si Erap ng sariling kumpanya:

ANG MAYOR

ng Philippine Princeton Poll.

Sa ikatlong pagkakataon, si Mayor Joseph Estrada ay muling inihalal ng bayan sa eleksiyon ng 1980, unang eleksiyon sa ilalim ng Martial Law. Ang nakalaban niya ay si Rodolfo Ibuna, anak ng dating mayor, si Nicanor Ibuna.

Marso 1975. Idinaos ang unang pagtatapos sa San Juan Municipal High School. Sa mga nasabing nagtapos, may mga propesyonal na - doktor, CPA, nars, guro, musiko, pintor at propesor!

Hanggang sa ibang bansa ay kinilala ang magandang performance ni Mayor Joseph Estrada sa San Juan. Inanyayahan siya ng konsulado ng Pilipinas sa Chicago, U.S. na maging panauhing pandangal sa pagdiriwang ng Chicago-RP Independence Week.

SA loob ng labing anim na taon, ang San Juan ay larawan ng patuloy na kaunlaran. Datapwa't naganap

ANG SENADOR

senado, ipinapaliwanag niya sa wikang Pilipino. Lalong nasasalamang sa kanyang talumpati ang damdamin niyang maka-Pilipino at makabansa.

"Huwag nating ipagpalit ang pambansang karangalan sa kuwarta ng dayuhan!"

"Panahon na upang putulin natin ang lubid na pumipigil sa ating pagtanda bilang isang bansa!"

"Ako ay laban dito dahil sa aking paningin, ito ay simbolo ng patuloy na pangangibabaw sa bansang Pilipinas ng kuko ng agila!"

At upang magkaroon ng diin sa isipan ng Pilipino ang isyu ng U.S. bases, ginawa ni senador Estrada ang pelikulang **Sa Kuko ng Agila**, at sinikap niyang maging leading lady niya sa nasabing pelikula ang isang

ANG PANGALAWANG PANGULO

larangan para sa mga mamumuhunang dayuhan.

Sa kabila ng mga tungkuling ginagampanan niya, laging may lugar sa kanyang panahon ang pangangalaga sa kapakanan ng kabataang Pilipino. Agosto 24, 1993. Inilunsad niya ang Philippine Drug

JE Productions at EMAR Pictures. Sa **Geron Busabos** ng EMAR niya tinanggap ang ikalawang tropeo ng Famas. Ginawa niya ang kanyang dream picture - **Ito ang Pilipino** - sapagka't nadarama na niya ang layuning makapaglingkod sa lalong malaking bahagi ng tao, - pulitika.

Naghatid sa kanya ng ikatlong parangal ng Famas ang **Ito ang Pilipino**, 1966.

Sa patuloy na paglalahad ng karera ni Erap sa pelikula, sa **Patria Adorada** ng Emar at **Kumander Alibasbas** ng JE siya tumanggap ng ikaapat at ikalimang tropeo ng Famas na nagluklok sa kanya sa Famas Hall of Fame!

Anupa't sa larangan ng pag-aartista nagtanim ng pagsisikap si Erap at umani ng malaking bahagi para sa kanyang tinatamong tagumpay sa kasalukuyan!☺

ang sinasabing PEOPLE POWER.

Sumiklab ang **BATTLE FOR ERAP** nang tutulan ni Mayor Estrada at ng kanyang mga supporter na bumaba siya sa munisipyo upang bigyang-daan ang pag-upo ng officer-in-charge o O.I.C. Naroon na naman ang kaibigan ng alkalde, si Fernando Poe, Jr. upang damayan siya, payapain ang lumubhang sitwasyon sa San Juan.

Alang-alang sa ikatatahimik ng San Juan at mailayo sa kapahamakan ang mga mamamayan, bumaba si Mayor Estrada sa munisipyo. Pero, sa mga opisyal ng San Juan Citizens Council niya iniwan ang simbolong "susi ng bayan."

At masasabing siya lamang ang mayor na nakapag-iwan ng malaking halaga sa kaban ng bayan - P24 MILYON!

Mahigit na labing-anim na taong mayor ng San Juan si Erap.

"KAILANMA'Y HINDI AKO MAAARING MAPAGOD SA PAGLILINGKOD SA MAMAMAYAN!"☺

magandang anti-bases na kongresista - si Rep. Nikki Coseteng!

Nakatulong ang **Sa Kuko ng Agila** sa kampanya ng mga senador laban sa ekstensiyon ng U.S. bases sa bansa.

Enero 14, 1989. Si Senador Joseph Estrada ay isa sa tatlong nahirang ng Philippines Free Press, Outstanding Senators.

Abril 10, 1991. Iginawad kay senador Estrada ng University of Pangasinan ang karangalang Doctor of Humanities *honoris causa* sa Lungsod ng Dagupan bilang pagkilala sa "exemplary record of humanitarian service and selfless devotion to public welfare" ni Senador Estrada.

Minsan pang pinatunayan ni Erap ang pagiging "pro-poor at pro-Filipino" niya!☺

Abuse Resistance Education (PhilDare). Ito lamang ang masasabing drug prevention program sa bansa na pinamamatnugutan ng mga piling opisyal ng pulisya na nagsasanay upang ituro sa kabataan ang DARE Curriculum.

Dapat lamang parangalan si Vice President Joseph Ejercito Estrada ng 1993 Man of the Year ng ABS-CBN!☺

TALATAKDAAN NG MGA GAWAIN
PANUNUMPA SA TUNGKULIN AT PASINAYANG TALUMPATI
NG HALAL NA PANGULO
JOSEPH EJERCITO ESTRADA
Ika-30 ng Hunyo 1998

UNANG BAHAGI -
MALOLOS, BULACAN

MGA GAWAIN BAGO IDAOS ANG PASINAYA:

Asalto sa halal na Pangulo (Bisperas ng mga Seremonya sa Panunumpa sa Tungkulin).

6:00 N.U. BUKANG LIWAYWAY (DIANA)

Iba't ibang mga banda ang maglilibot sa bayan.

8:00 N.U. PAGDALAW NI HALAL NA PANGULONG JOSEPH EJERCITO ESTRADA AT NG KANYANG PA-MILYA SA MUSELEO SA SEMENTERYO NG SAN JUAN.

8:45 N.U. PAG-ALIS NI HALAL NA PANGULONG JOSEPH EJERCITO ESTRADA, GINANG LOI ESTRADA AT MGA MIYEMBRO NG PAMILYA PATUNGONG KAMPO AGUINALDO.

8:55 N.U. PAGDATING NG MGA MIYEMBRO NG KONGRESO SA SIMBAHAN NG BARASOAIN.

9:00 N.U. PAGDATING SA KAMPO AGUINALDO NI HALAL NA PANGULONG JOSEPH EJERCITO ESTRADA, GINANG LOI ESTRADA AT MGA MIYEMBRO NG PAMILYA. PAG-ALIS PATUNGONG MALOLOS, BULAKAN.

9:05 N.U. PAGDATING NG MGA MIYEMBRO NG GRUPONG DIPLOMATIKO SA SIMBAHAN NG BARASOAIN.

9:10 N.U. PAGDATING NG MGA MIYEMBRO NG GABINETE (PAPALIT AT PAPAALIS) AT NG MGA MIYEMBRO NG KATAASTAASANG HUKUMAN SA SIMBAHAN NG BARASOAIN.

9:15 N.U. PAGDATING NI GNG. MARY VDA. DE EJERCITO, MGA MIYEMBRO NG PAMILYA, G. FERNANDO POE, JR. SA SIMBAHAN NG BARASOAIN.

9:20 N.U. PAGDATING NI PUNONG MAHISTRADO AT GINANG ANDRES NARVASA SA SIMBAHAN NG BARASOAIN.

9:25 N.U. PAGDATING NI HALAL NA PANGULAWANG PANGULONG GLORIA MACAPAGAL-ARROYO AT PAMILYA SA SIMBAHAN NG BARASOAIN.

9:30 N.U. PAGDATING NI HALAL NA PANGULONG JOSEPH EJERCITO ESTRADA, GINANG LOI ESTRADA AT MGA MIYEMBRO NG PAMILYA SA BULACAN STATE UNIVERSITY OVAL.

9:40 N.U. PAGDATING NI PANGULONG FIDEL V. RAMOS SA BULACAN STATE UNIVERSITY OVAL.

9:50 N.U. AALIS SINA PANGULONG FIDEL V. RAMOS AT HALAL NA PANGULONG JOSEPH EJERCITO ESTRADA PATUNGONG KAPITOLYONG PANLALAWIGAN NG BULAKAN.

Sina Pangulong Fidel V. Ramos at halal na Pangulong Joseph E. Estrada ay sasakay sa Kotse na Pampanguluhan patungo sa Kapitolyong Panlalawigan.

Si Unang Ginang Amelita M. Ramos at mga miyembro ng pamilya ay sasakay sa mga Sasakyang Pampanguluhan at diretsong tutuloy sa Simbahan ng Barasoain na kung saan ay sasalubungin sila ng pamilya ng halal na Pangulo.

10:00 N.U. PAGDATING NINA PANGULONG FIDEL V. RAMOS AT HALAL NA PANGULONG JOSEPH E. ESTRADA SA KAPITOLYONG PANLALAWIGAN.

10:05 N.U. PAGDATING SA TANGGAPAN NG GOVERNADOR.

10:20 N.U. SIMULA NG PARADA PATUNGONG SIMBAHAN NG BARASOAIN (HATID KASAYSAYAN).

Sina Pangulong Fidel V. Ramos at halal na Pangulong Joseph E. Estrada ay sasakay sa isang karuwahe para sa parada mula sa Kapitolyong Panlalawigan patungo sa Simbahan ng Barasoain.

11:05 N.U. PAGDATING NINA PANGULONG FIDEL V. RAMOS AT HALAL NA PANGULONG JOSEPH EJERCITO ESTRADA SA SIMBAHAN NG BARASOAIN.

MGA PARANGAL SA PAGDATING

Ang Hepe ng Estado Mayor ng Sandatahang Lakas ng Pilipinas ang magiging punong abalang militar para sa mga Parangal sa Pagdating.

GRUPONG SASALUBONG :

1. Ang Kabanal-banalang Rolando Tria Tirona.
2. Kalihim Tagapagpaganap Alexander Aguirre, Tagapangulo ng NOC.
3. Kinatawan Rolando Zamora, Papasok na Kalihim Tagapagpaganap.
4. G. Rod Reyes, Kapuwa-Tagapangulo ng NOC.

11:30 N.U. PAGPASOK NINA PANGULONG FIDEL V. RAMOS AT HALAL NA PANGULONG JOSEPH E. ESTRADA SA SIMBAHAN NG BARASOAIN.

Ang Malolos Cathedral Choir ay aawit ng "Himno Paunlak sa Kongreso" na orihinal na inawit noong Setyembre 1898 sa Pasinaya ng Kongreso ng Malolos.

11:40 N.U. SIMULA NG MGA SEREMONYA SA PANUNUMPA SA TUNGKULIN

1. Pambansang Awit
U.P. Madrigal Ensemble
2. Papuring Dalangin
U.P. Madrigal Ensemble

11:50 N.U. PANUNUMPA SA TUNGKULIN NI HALAL NA PANGALAWANG PANGULONG GLORIA MACAPAGAL-ARROYO

Ipatutupad ni Punong Mahistrado ng Kataas-taasang Hukuman Andres Narvasa.

12:00 N.H. PANUNUMPA SA TUNGKULIN NI HALAL NA PANGULONG JOSEPH EJERCITO ESTRADA

Ipatutupad ni Punong Mahistrado ng Kataas-taasang Hukuman Andres Narvasa.

12:30 N.H. KATAPUSAN NG SEREMONYA SA PANUNUMPA SA TUNGKULIN. PAGALIS NINA PANGULONG JOSEPH EJERCITO ESTRADA AT DATING PANGULONG FIDEL V. RAMOS PATUNGO SA BSU OVAL.

12:45 N.H. PAGDATING NI PANGULONG JOSEPH E. ESTRADA, GNG. LOI ESTRADA, DATING PANGULO AT UNANG GINANG FIDEL V. RAMOS AT MGA MIYEMBRO NG PAMILYA SA BSU OVAL. PAG-ALIS PATUNGONG PARKE NG MALAKANYANG.

1:15 N.H. PAGDATING NI PANGULONG JOSEPH E. ESTRADA, UNANG GINANG LOI ESTRADA AT MGA MIYEMBRO NG PAMILYA SA AREA 3, PARKE NG MALAKANYANG. SASAKAY PAPUNTA SA PREMIER GUEST HOUSE.

PANGALAWANG BAHAGI - PALASYO NG MALAKANYANG

11:00 N.U. PAGDATING NG MGA ASAWA AT MGA MIYEMBRO NG PAMILYA NG MGA KALIHIM NG GABINETE.

1:25 N.H. PAGDATING NI PANGULONG JOSEPH E. ESTRADA, UNANG GINANG LOI ESTRADA AT MGA MIYEMBRO NG PAMILYA SA PREMIER GUEST HOUSE. LIBRENG ORAS NG PANGULO.

1:45 N.H. SI PANGULONG JOSEPH E. ESTRADA AY LILIPAT SA BULWAGANG PANGSEREMONYA.

1:55 N.H. PAGDATING NI PANGULONG JOSEPH E. ESTRADA SA PANG ESTADONG SILID KAINAN.

2:25 N.H. PAGSISIMULA NG SEREMONYA SA PANUNUMPA SA TUNGKULIN NG MGA MIYEMBRO NG GABINETE MGA PAGKAKATAON SA PAGKUHA NG MGA RETRATO

3:00 N.H. KATAPUSAN NG MGA SEREMONYA SA PANUNUMPA SA TUNGKULIN NG MGA MIYEMBRO NG GABINETE. PAGLIPAT SA PANG ESTADONG SILID KAINAN.

3:05 N.H. PAGDATING SA PANG ESTADONG SILID KAINAN/ SIMULA NG PULONG NG GABINETE

1. Pambungad na Dalangin:
Kapatid Andrew Gonzales, Papasok na Kalihim, DECS

2. Pagsisimula ng unang pulong ng gabinete.

(Mga alituntunin at derektiba mula sa Pangulo sa kanyang Gabinete.

3:35 N.H. MATATAPOS ANG PULONG NG GABINETE. ANG MGA MIYEMBRO NG GABINETE AY SASAKAY SA KANIKANILANG MGA ITINAKDANG SASAKYAN AT TUTUNGO SA QUIRINO GRAND STAND.

PANGATLONG BAHAGI - QUIRINO GRANDSTAND

4:00 N.H. PAGDATING NI PANGULONG JOSEPH E. ESTRADA AT UNANG GINANG LOI ESTRADA SA QUIRINO GRANDSTAND. MGA PARANGAL SA PAGDATING PARA KAY PANGULONG JOSEPH E. ESTRADA.

Si Unang Ginang Loi Estrada ay sasamahan sa Grandstand habang isinasagawa ang mga Parangal para kay Pangulong Joseph E. Estrada

4:15 N.H. SIMULA NG PARADANG SIBIKOMILITAR

5:00 N.H. KATAPUSAN NG PARADANG SIBIKOMILITAR. SIMULA NG PALATUNTUNAN PARA SA PASINAYANG TALUMPATI NG PANGULO.

Palatuntunan

1. Pambansang Awit

Pangungunahan ni Bb. Nora Aunor sa tradisyonal na kumpas na 59 segundo.

2. Panalangin

Ni Kapatid Mike Velarde sa Harapan ng mga Kinatawan mula sa ibat-ibang sektang relihiyoso.

3. "Isang Dugo, Isang Lahi, Isang Musika"

Aawitin ng Meralco Choir.

4. Pasinayang Talumpati ni Pangulong Joseph E. Estrada.

6:05 N.G. KATAPUSAN NG PASINAYANG TALUMPATI NG PANGULO. MGA PARANGAL SA PAGLISAN

6:15 N.G. KATAPUSAN NG MGA PARANGAL SA PAGLISAN / BABALIK SA MALAKANYANG

Pagkaalis ng Pangulo, magkakaroon ng maikling palatuntunang pang ebanghelyo (sa pamamagitan ng El Shaddai) na mauuna sa pagpapakita ng mga lulis.

7:00 N.G. PAGTATANGHAL NG MGA LUSIS.

7:30 N.G. SIMULA NG PASINAYANG KONSEYERTO: "SALUDO SA PANGULO"

Handog ng Industriya ng Pelikulang Pilipino



• LUPON NG PAMBANSANG PAGSASAAYOS •

Kalihim Tagapagpaganap
ALEXANDER AGUIRRE
TAGAPANGULO

MGA KASAPI

SEN. ORLANDO MERCADO
KONG. RONALDO ZAMORA

Nakatalagang Kalihim ng Pamamahayag
ROD REYES

VICENTE RIVERA, JR.

Nakatalagang Kalihim ng Turismo
GEMMA CRUZ ARANETA

RONALD PUNO
JESSE M. EJERCITO

Gumaganap na Pinuno, Katulong na Kalihim
DEMETRIO IGNACIO

Nakatalagang Pinuno
LENNY DE JESUS

GOB. JOSIE DE LA CRUZ
MAYOR VICENTE CRUZ

ANGELES ABES
MSGR. JOSE AGUILAN
ATTY. EMMANUEL SISON

• LATHALANG MAGPAPAALAALA •

"PANUNUMPA SA TUNGKULIN AT PASINAYANG TALUMPATI NG HALAL NA PANGULO"

Patnugot

BERT R. MENDOZA

Katulong na Patnugot

NINOY T. SOFRANES

Katulong sa Patnugutan

BETTY R. MARTINEZ

Direktor ng Sining

ROMAN A. MONTEVERDE

Mga Potograpo:

EDWIN FORNOLES, Mga Pabalat; Pahina 18, 20, 21, 22, 23
RUDY LIWANAG, Manila Bulletin; Pahina 4, 7, 8
REGGIE MASON, Manila Bulletin; Pahina 6, 10, 11, 12, 13

EDWIN TUYAY, Pahina 3
JUN ARANGONIN, Pahina 16, 17
ROMAN A. MONTEVERDE, Pahina 14, 15

KABATAAN, ISA SA MGA PRAYORIDAD NG HALAL NA PANGULONG ESTRADA

Sa mga pahayag ni Pangulong Joseph Estrada hinggil sa mga prayoridad ng kanyang administrasyon, laging binibigyan niya ng diin ang malawakang pagpapaunlad ng kapakanan ng kabataan.

Ang totoo, alkalde pa lamang ng San Juan ang pangulo, nakita na sa kanya at kinilala ng bayan ang malaking malasakit niya sa kabataan – wala pang isang taon sa panunungkulan, nakapagpatayo siya ng pansamantalang municipal high school. Noon ay sa ibang bayan pa o lungsod nagpapatuloy ng high school ang mahihirap na mag-aaral ng San Juan.

Sa loob ng sumunod na taon, 1971, naitayo niya ang tatlong palapag na gusali ng unang mataas na paaralang pampubliko sa nasabing bayan.

At upang mapalawak pa ang kanyang paglilingkod sa kabataan, itinatag niya ang Erap Para sa Mahirap Foundation, Inc. na nagbukas ng scholarship program. Ngayon, mahigit na pitong libong scholar ang nag-aaral sa ilalim ng foundation sa iba't ibang panig ng kapuluan.

“Ang kabataan ay pag-asa ng bayan.”

Ang mga katagang ito ni Dr. Jose Rizal ay nakatanim na sa isipan at pagpapahalaga ng Pilipino na marapat lamang na ipagkaloob sa kabataan ang sapat at malakas na suporta upang lalong mag-alab ang pagsisikap ng bawa't kabataan na maging bahagi ng katuparan ng pag-asang inaasahan ng bayan!

Ito ang tunay na dahilan kung bakit higit na matimbang sa pagpapahalaga ni Erap ang kapakanan ng kabataan!☺

Mabuhay ka, Sir Erap!





**“... Patnubayan
Nawa Ako Ng
Panginoon!”**

PANUNUMPA SA TUNGKULIN

**NG HALAL NA
PANGULO
NG**

REPUBLIKA NG PILIPINAS

JOSEPH EJERCITO ESTRADA

**HUNYO 30, 1998 • SIMBAHAN NG BARASOAIN
MALOLOS, BULAKAN**